


LETTRE
MISSIVE

D'VN GENTILHOMME

CATHOLIQUE, AD-
dressante à vn sien voisin,
du party Contraire.

M. D. LXXXIX.



LETTRE MISSIVE

D'VN GENTILHOM-
ME CATHOLIQUE AD-
dressante à vn sien voisin du party
Contraire.

MONSIEVR, ayant entendu que vous estiez à la suite de l'armée du Roy de Nauarre. I'ay bien voulu vser de ceste courtoisie en vostre endroit que de vous faire part de noz nouuelles, & de ce que i'ay cõgneu en l'armée Catholique, cõduite par Monseigneur le Duc de Mayëne, que i'ay suyui & suitz, avec autāt d'affectiõ que le merite de la cause le requiert, & en ceste suite, i'ay cogneu à veuë d'œil q̃ Dieu ne vous veut pas perdre, encores que suyuiiez vn party contraire à sa religion: Mais que sa preuoyance diuine vsant de dilation pour vous conuertir au vray party de la Re-

ligion Catholique Apostolique & Romaine, ne vous a voulu exterminer ny ceux qui sont en ceste suite & qui se dient Catholiques: encores que soit par malice, ou par infirmité naturelle, ou bien en esperance de recompense temporelle, & encores endormis sur le liét d'ambitiō & tyrannie, ils ayēt fuiuy vn chef heretique, plein d'hypocrisie, relaps & perfide, mais leur faire paroistre par vne patience & vraye experience qu'ils fausent de prendre pied aux parolles & promesses d'un Heretique, qu'ils doiuent quitter & leur donner loisir de pēser à leurs consciences & ne se pas perdre. Je dits cecy, non par quelque mal-veillāce particuliere, mais pour la seule verité & l'experience des choses passées qui me le font cognoistre. Je partis de la Brie, accompagné de cinq ou six Gentils-hommes de mes amis, pour suyure le camp des Catholiques qui partit de Paris, pour faire leuer le siege que le Roy de Nauarre tenoit deuant Rouen, d'où il sortit si tost qu'il entendit la venue de nostre cāp, & se referra à Dieppe & Arques, où il fust assiegé & y veis des actes de guerre de part & d'autre assez gentils, Et comme ie pensois que l'on deust passer outre, & continuer ce siege qui estoit à nostre aduantage, & qui se

pouuoit emporter, continuât la batterie en ruine que Monsieur de Mayenne auoit cōmencee, ou pour le moins vous rendre fort incommodes & hors d'esperance de paroistre dedans la ville, ou vous'estiez referrez. Et en fin la necessité vous pressant, comme vous estiez hors de secours, sans doute vostre ruine estoit prompte. Toutesfois ie fuz estōné que la retraicte se fit & les deux cāps prenans diuers chemins, ne s'attaquerēt en façon quelconque, le vostre fuyāt, & le nostre ne s'auançant, & ne sçauois quels desseings portoient les vns ny les autres, sinon en fin que les effects me les ont fait cognoistre. Car comme celuy de Monsieur le Duc du Maine estoit d'attirer la Noblesse Catholique à son party sans coup frapper ny la ruiner, mais conduire les choses par là douceur & pieté, comme est sa coustume. Au contraire ie recogneuz q̄ le dessein du Roy de Nauarre estoit de saccager, ruiner & faire piller par son armée tout le plat pays & villes de l'vnion & principalement la ville de Paris, sur laquelle il a l'œil de vengeance fiché. Et de faict par intelligēce qu'il auoit tramee avec aucuns habitās de la ville mal affectiōnez au party des Catholiques & fauorisans les heretiques, se presenta le iour

de Toussainets avec toute son armee aux tranches qu'il emporta fort aisement, pour n'estre guarnies ny deffendues suffisamment. Et de la poursuuant sa pointe surprint les fauxbourgs qui n'estoient aucunement gardez, ou il y fut fait actes inhumains & plains de cruauté à la mode de l'heretique sur les pauvres habitans desdits fauxbourgs, partie desquels estoient aux Eglises, & autre partie en leurs maisons preparez pour y aller, & estimoit le Roy de nauarre pour tout asséuré emporter la ville de Paris, rât par le moyen de l'intelligence qu'il auoit de dix à vnze mil personnes qu'il auoit à sa deuotion en ladite ville, que pour l'absence de Monsieur du Mayne, auquel il auoit tranché les passages des riuieres, par le moyen desquels il ne pouuoit donner prompt secours à la ville. Tellement que veu sa disposition, & le peu ou point de forces qui estoient en la ville, qui n'estoit gradee que des habitas, vne partie, desquels s'entendoient avec le Roy de Nauarre, vne autre partie intimidez de cest effroy perdirêt courage, & n'auoiēt recours qu'à ioindre & tendre les mains au Ciel, & ne restoit qu'un petit nôbre qui allant deçà, delà, les armes en main baricadoiēt les portes & rues de ladite ville, & faisoiēt ce qu'ils

pouuoient. De sorte que ie m'estonne qu'en ce desordre la ville ne fut emportee. Et puis dire avec verité que Dieu seul l'a conseruee, vous ostant tout iugement de guerre & poursuite de victoire. Mais comme Dieu quāt il luy plaist dissipe le conseil des aduersaires de son peuple & arreste leurs courses, Ainsi ie recognois que luy seul à retenu sa Iustice sur ce pauvre peuple vsant de vostre armee conduite par le Roy de Nauarre comme d'un fleau qui ne peut passer outre les bornes de son iugement, ce qu'en fin sera consommé quāt ce grand Dieu n'en voudra plus vser, & que noz fautes seront derriere sa face. Je sçay qu'en vostre armee on tenoit ce langage que le Roy de Nauarre ne vouloit prendre la ville, & qui se contentoit pour ceste fois des faux-bourgs & qu'il auoit pitié du peuple. Si la verité, ou tant soit peu de raison vous accompagne, ie vous laisse à penser, si ce dire se peut soustenir veu, les menaces, les apprests, les conseils, les intelligences, les entreprinſes, & la consequence de la prinſe de la ville de Paris, de laquelle depend la cōseruation de toute la Chrestienté. Si le Roy de Nauarre estoit vn innocent, & peu versé aux affaires de la guerre & de l'Estat. Cela auroit quelque ap-

parce, ou s'il estoit si religieux & pieux qu'on
 la coustume fust de conuertir sa victoire en
 pieté, & ses actiōs en la iustice, ceste excuse
 auroit quelque ombrage, mais luy qui est
 ennemy capital des Catholiques & de la re-
 ligiō, luy qui à iuré & protesté l'heresie, luy
 qui est vn relaps, qui a intelligence & sup-
 port de tous les Heretiques de l'Europe qui
 est aydé secouru & fauorisé d'eux. Brief qui
 n'a autre intentiō que de ruiner l'Eglise Ca-
 tholique & ce Royaume, & y establir vne
 sinagoge d'heretiques, luy qui sçait & co-
 gnoist que le support des Catholiques &
 l'encouragement de toutes les villes vnies
 tiennent pied de la ville de Paris (qui estant
 consommee le reste s'en va en fumee) luy
 qui est vn sage mondain, ait voulu lascher
 cest aduantage que de quitter la ville de Pa-
 ris s'il eust eu moyen de la gagner & rendre
 maistre. Cela est hors de la raison & tout
 bon iugemēt. Cela ne se peut croire n'y per-
 suader, les effects estans tous contraires:
 Pourneant eut-il brassé vne trahison dedās
 la ville s'il n'eust eu affectiō d'y entrer pour-
 neant eust-il pris les faux-bourgs & iceux
 pillez, rauagez, & saccagez, & les habitans
 tuez & prins à rançon s'il eust voulu vser de
 grace à la ville & la soulager. Il ressemble ce-

luy qui mettant le feu en vne maison, il dit pour s'excuse que ce n'est pas pour la bruler du tout, mais vne partie seulement, comme s'il diuisoit son affection en vne partie de maison plus qu'en l'autre, telles excuses sont trop lourdes. Disons & tendōs à la verité & recognoissōs tous que c'est vn miracle de Dieu qui n'a voulu permettre la prise & saccagement d'une telle ville remplie d'un bon nombre de gens de bien, que Dieu ne permettra estre ruinez, mais les sauuera & parmy eux les meschans qui y sont, en intention de s'amender. Les propos que j'ois tenir à tous les chefs de vostre armee qui estoient logez aux faux-bourgs, me font croire que l'intention du Roy de Nauarre & sa resolution n'estoit de forcer la ville, & la prendre s'il pouuoit, & dōner le pillage des Catholiques & faire mourir les hommes & forcer les veufues de se marier avec les Gascons. Bref y user de toute felonie & cruauré, & n'eust esté la venue de Monsieur du Mayne (que Dieu miraculeusement conduit à Paris) sans doubte vous sçauiez qu'il estoit resolu de donner assault à la ville par quatre endroits. Le Sieur Brigueux qui estoit au Bouleuert de la porte S. Iaques en conferant avec le Sieur de la Chastigneray &

Ville-neufue, qui estoient sur les murs de la porte saint Jacques le lendemain de la Toussaincts à cinq heures du matin, leur dit que dedans le midy ils verroient de beaux ieux & qu'il leur seroit besoin de recognoistre leur Roy, & tous les autres chefs disoiēt le sēblable, mais les Sieurs de la Chastignearay & Ville-neufue ne firēt pas grand cōpte de leurs menaces pour la resolutiō qu'ils auoiēt & ont en ce parti, ou ils se sōt cōportés tres-fidelemēt. En fin vos chefs proposoiēt de beaux desseins, mais Dieu en dispoit tout autremēt. Que l'on ne die pas dōcques que si le Roy de Nauarre eust voulu il fut entré à Paris. Ce morceau n'est propre à son goust, il n'a sceu, ny peu, quelque effect & dessein qu'il ait dressé. Au surplus, ie m'estonne de vous & de plusieurs nos amis, qui se dient Catholiques, comment ils suiuent vn chef heretique, de ma part, ie ne puis iuger autre chose, sinon, ou que soyez sans religion, ou bien que quelque vengeance particuliete vous faiēt suiure vn tel chef. De dire qu'il a promis se faire Catholique & sous ceste esperance le suiure, c'est comme celuy qui accompagne vn voleur en intention qu'il s'amendera. Il me semble que tout hōme de bon iugement deuroit se former vne

maxime tres-veritable & certaine qui est de prendre & suiure le certain & quitter l'incertain. Vous suiuez se dites vous le Roy de Nauarre en esperance qu'il se fera Catholique dedans six mois. Et ce pendât vous le fauorisez en ses entreprinſes & l'accôpaignez, vous faites la guerre aux Catholiques, & dites qu'ils font mal de ne vouloir recognoistre le Roy de Nauarre pour leur Roy. Et en ce faisant vous delaissez le party de l'union des Catholiques, approuué par nostre S. Pere le Pape, & duquel party les chefs sônt notoirement catholiques. Pardonnez moy, si ie dits que vous estes sans religiô, puis que vous suiuez vn chef qui n'en a point, & qui demande, terme pour en choisir, & croyez au reste qu'il est plus malicieux que vous, par ce que ſaidât de vous pour nous ruiner, il ſçaura biẽ par apres venir à bout de vous, si vous n'adherez à son heresie, & conſequẽment regardez en quel hazard vous mettez nostre religion. Ie puis dire avec verité, que vous suiuez vn chef qui est sans religion, & sans foy, & nous, nous ſuiuons vn Prince plein de religiô & de foy, qui est remply de clemence & vertu, & le voſtre réply de ſang de vengeance & d'impieté. Il estoit en la puissance des Princes & peuple Catholique

d'exterminer to^r leurs plus cruels ennemis, ils les ont tenus en leurs mains, ils les ont enlargis, en esperance d'amandement, & souz leur foy, laquelle ils ont violee, & avec vn insigne perfide pris le party contraire, pour nuire & ruiner celuy des Catholiques, lesquels ont vsé de toutes les courtoisies qu'ils ont peu, pour attirer de leur party tous ceux qui se disoient Catholiques, & specialemēt la Noblesse, à laquelle ils ont baillé tous moyēs & facultez, se sont iettez entre leurs bras pour les cōduire & deffendre obeissant à leurs commandemens, & non pour autre occasion que de conseruer leur religion & l'Estat Monarchique de ce pauvre royaume qui n'est dissipé que de ceux qui le deueroiēt maintenir. En fin ie vous puis asseurer que i'ayme mieux mourir avec le party des Catholiques que de viure avec vn party bigarré d'heretiques, comme celuy que suiuez. Nostre party est aduoué par la sainctecté du Pape, & secouru par les Potentas Catholiques. Celuy que suiuez est non seulement des-aduoué, mais excōmunié, heretique, & relaps. Vostre armee remplie d'Anglois heretiques & autres ennemis de la France, nostre armee cōposée de tous Catholiques soient François ou estrangers, nous ne souf-


frons point de bigarrure, car nous combattons pour la religion que vostre chef heretique nous veut oster. Et encores qu'en ce Camp il y ait des Suysses & Reistres, si est-ce qu'ils sont Catholiques, & voz estrangers sont tous heretiques, & de là l'on cognoist que chacun cherche son semblable. Pensez y bien, & qu'il ne vous soit point reproché ny aux autres, qui se dient Catholiques, qui suiuent le party du Roy de Nauarre heretique, que par vostre conuiuence & aide l'heresie soit plantée en ce Royaume de France. Car ie puis dire (à mon grand regret) que sans l'aide & faueur de la Noblesse de la France qui suit le Roy de Nauarre, qu'il a aueuglez d'une vaine esperance, iamais luy, ny ses partisans, comme la Nouë, Chastillō, & autres chefs heretiques n'eussent pris ceste hardiesse de regarder ceste France pour la ruiner & posseder, comme ils ont tasché & qu'ils se promettent, souz la seule faueur de la Noblesse. Chose estrange que la Noblesse qui est establie pour le soustenement de la religion, serue & coopere à la ruine & perte d'icelle, se laissant emporter par vn amielement veneneux & promesses mensongeres d'heretique. En l'honneur de Dieu aduisez de vous destourner de cest orage, &

& que comme la Noblesse doit estre le support de la religion, il ne soit point dit ny escrit qu'elle a esté cause de sa ruine. Car ie m'engage deuant Dieu & les hommes que si vous suiuez encores le party des heretiques, il ne sera pas en vostre puissance, ny de tous voz compagnons de vous exempter de leurs mains, & qu'estans les plus forts, & nous ayans vaincus (que Dieu ne veuille) ils ne vous cōtraingnēt à croire en leurs dieux ou ils vous massacrerōt, pource que c'est vne maxime tres-veritable que là ou l'heretique est le plus fort, le Catholique est forcé & contrainct de quitter sa religiō ou mourir cruellement entre leurs mains. Les exēples de l'Angleterre de Suede, & de Dannemarc en sont tesmoins. Partāt ie vous supplie & coniure en l'honneur de Dieu & de son Eglise d'amander ce qu'avez fait par le passé par vne mutuelle vnion avec les Catholiques, qui ne demandent qu'à embrasser leurs semblables, quelque mēsonge que l'on die au contraire, iamais le peuple n'a desiré commander ny se venger, mais d'obeir & viure sous vne monarchie, & ainsi l'ay congneu & veu, & tout ce à quoy ils s'opposent est à l'heresie & tyrannie, tellement que ie puis dire avec verité, que ceux qui leur

font contraires sont ou heretiques ou Tiras.
 Quant le Roy de Nauarre se diroit maintenant Catholique, ie luy demanderois caution pour viure avec luy en assurance, veu qu'il a tant de fois reuocqué sa foy, & declaré comme tel vn relaps & excommunié par nostre Sainct pere, chef de l'Eglise, tellement qu'il ne faut pas qu'il commence par vne simple declaration ou demonstration qu'il est Catholique, mais faut qu'il commence par vne penitence & qu'il soit releué & absouz de l'excommunication, & que sa iustificatiō soit cogneue à tous par bonnes œuures, & actions publiques auant que de se fier en luy n'y le receuoir avec nous, autrement se seroit se soubs-mettre à l'aduanture & mettre nostre religion en hazard (chōse qui ne se peut faire sans offencer) Dieu qui ne veut que son peuple ayt pour Roy & protecteur qu'un fidelle & approuué Catholique, & non vn heretique relaps excommunié & condamné, ie dits Roy pour le point de nostre religion seulement, qui est tout nostre but & intention. Car quant à l'Estat, il y a des raisons droites & debats particuliers que Monseigneur le Cardinal de Bourbon peut iustement disputer pour la preference, comme le plus proche à succeder à la Couronne,

& le quel nous tenons & auons publié pour
 nostre vray Roy, comme estant tres-Catho-
 lique, & qui à ceste occasion le Roy de Na-
 uarre tient prisonnier iniustemēt pour luy
 oster son droit, comme est la coustume
 des heretiques de impieter & enuahir les
 droits d'autrui, & qui n'ont autre suiet que
 de troubler les ames & les corps, & raurir les
 biens de ceux qui leur sont contraires, mais
 la seule raison qui à meul les Gentils-hom-
 mes Catholiques, & le peuple Catholique
 à synir & bander contre le Roy de Nauar-
 re, est le seul respect de la religion. Qui sup-
 pose que la couronne luy appartient, que
 non, si-est ce qu'estant heretique, il en est
 indigne, & est vrayemēt tenter dieu de s'at-
 tendre à sa conuersion, de se fier en luy, &
 l'approuuer en attendant vne pretendue
 conuersion qu'il ne fera iamais pour main-
 tenir les Catholiques, & s'il la fait, ce sera
 pour nous tromper, comme a fait la Roynē
 d'Angleterre sa bonne amie, son support &
 son appuy: car l'heretique a ceste maxime de
 viure deguisé iusques à ce qu'il soit maistre,
 & qu'il faut estre hypocrite pour regner, &
 vous puis asseurer que vous n'auēz iamais
 veu vn heretique pretendre à vne couronne
 qui ait gardé sa foy, & quelque promesse

qu'il face au commencement aux Cathoïques, ce n'est que pour les tromper: car si tost qu'il est le maistre, ils les contrainst de viure à sa mode, estant indubitable qu'un Serpent tel que l'heretique, ne peut endurer pres de luy & avec luy vne bonne odeur. Aduisez doncques s'il y a certitude de si fier. Conseruons nous en l'honneur de Dieu, que ie prie vous donner cognoissance de la vertu, & de vostre protection, & la nostre: car plus vous attendrez à vous ioinde avec les Princes Gentils-hommes, & peuple Catholiques vnis, plus vous ferez cause de maux en ceste pauvre Frâce, mais en fin si demourez opiniastres, nostre esperance n'est pas en vous n'y aux forces humaines, mais en ce grand Dieu, qui en un clein d'œil peut renuerser vos cōseils & vos forces, & qu'il fera (si bien tost vous ne vous conuertisez & vnisez avec nous) ce que nous desirons & inuitons au nom du Dieu viuant, Que ie prie de rechef vous en faire la grace. De la queue en Brioc septieme Nouembre, mil cinq cens quatre-vingts-neuf.



F I N.